

## АКАФИСТ ПРЕСВЯТЕЙ И ЖИВОТВОРЯЩЕЙ ТРОИЦЕ

### Кондак 1

**Предвечный Царю веков и Господи, / вся твари видимыя и невидимыя  
Содетелю, / Емуже, в Троице Святей славимому Богу, / всяко колено  
поклоняется Небесных, земных и преисподних: / темже и мы, яко  
крещении в Трисвятое имя Твое, / аще и недостойнии, хвалебное сие  
дерзаем принести Тебе пение: / Ты же, яко Творец, Промыслитель и Судия  
наш, / вонми гласу раб Твоих, и не остави милости Твоея от нас, / да из  
глубины души выну зовем Ти: // Свят, Свят, Свят еси Господи Боже наш,  
помилуй ны, падшее создание Твое, имене ради Святаго Твоего!**

### Икос 1

**Архангели и Ангели, Начала и Власти, Престоли и Господствия,  
предстояще самому Престолу Славы Твоея, не довлеют изрещи величия  
совершенств Твоих: многоочитии же Херувими и шестокрилатии  
Серафими, закрывающе лица своя, точию с трепетом и любовью взывают  
друг ко другу: Свят, Свят, Свят Господь Саваоф! Нам убо, иже прах и  
пепел есмы, кольми паче удобнее любити молчание; но, да не толиких  
щедрот, в создании и искуплении на нас излианных, непамятливи явимся и  
неблагодарни, подражающе горнему славословию, с верою и любовью  
взываем:**

**Свят, Свят, Свят еси Господи Боже наш, неисповедимая совершенств  
Высоте и неизследимая таин Пучино!**

**Свят еси Господи Боже наш, везде сый и вся исполняяй, Единый и Тойжде  
вчера, днесь и во веки!**

**Свят еси Господи Боже наш, вся могый, нарицаый не сущая яко сущая,  
низводяй даже до ада и паки возводяй!**

**Свят еси Господи Боже наш, испытуый сердца и утробы человеческия,  
исчитай звезды и всем им имена нарицаый!**

**Свят еси Господи Боже наш, Егоже вси путие истинны и все судьбы  
оправданы вкупе и вожделенны!**

**Свят еси Господи Боже наш, отдая грехи отцев на чада, милуый же и  
награждаый в роды родов!**

**Свят, Свят, Свят еси Господи Боже наш, помилуй ны, падшее создание  
Твое, имене ради Святаго Твоего!**

## Кондак 2

Видев Тя Исаия на Престоле висоце и превознесенне, глаголаше: “о яканный аз, яко человек сый и нечисты устне имый, и Господа Саваофа видех очима моима”. Егда же уголь горящий, носимый от Ангела, прикоснулся устом его, чисте восхваляше Тебе Отца, и Сына, и Святаго Духа, Единого Бога. Попали убо, о Пресвятая Троице, огнем Божества Твоего терние и наших многих беззаконий, да чистым сердцем возопием Тебе: Аллилуиа!

## Икос 2

**Разум** неуразуменный разумети ищя великий во пророцех Моисей, глаголаше: “Яви мне лице Твое, да разумно вижду Тя”. Ты же к нему: “Задняя Моя узриши, лице же Мое не явится тебе: не бо узрит человек лице Мое и жив будет”. Нам же, аще и недостойным, благоволил еси явити Себе в лице Единородного Сына Твоего: темже благодарне вопием:

**Свят, Свят, Свят** еси Господи Боже наш, Серафимов пламенногорящая любви и Херувимов выну светящая премудросте!

**Свят** еси Господи Боже наш, Небесных Престолов превышний Царю и премирных Господствий всеистинный Господи!

**Свят** еси Господи Боже наш, Вышних Сил непобедимая крепосте и горних Властей всемогущий Властителю!

**Свят** еси Господи Боже наш, Архангелов всерадостное благовестие и Ангелов немолкающая проповедь.

**Свят** еси Господи Боже наш, разумных Начал верховное Всеначало, и всех прочих небесных чинов державный Повелителю;

**Свят** еси Господи Боже наш, Един имеяй безсмертие и живой во свете неприступнем, со избранными же Твоими, яко со други, лицом к лицу беседуй!

**Свят, Свят, Свят** еси Господи Боже наш, помилуй ны, падшее создание Твое, имене ради святаго Твоего!

### Кондак 3

**Силою неизреченнаго могущества Твоего вся содержиши, Словом неизследимыя Премудрости Твояе вся строиши, Духом уст Твоих вся живиши и радуеши, о Трисолнечне Вседетелю! Измерил еси небо дланию и землю пядию, носиши и питаеши всю тварь, вся по имени призываеши, и несть могий утаитися властительныя десницы и взора Твоего: сего ради со всеми вышними и нижними силами, со умилением припадающе, зовем Ти: Аллилуиа!**

### Икос 3

**Имеяй всякое создание работно повелению Твоему, всюду являеши следы Промысла и неизчетных совершенств Твоих: темже невидимая Твоя и присносущную силу и Божество, твореньми помышляема, видяще, со удивлением и радостию зовем:**

**Свят, Свят, Свят еси Господи Боже наш, властительный Содетелю видимых и невидимых, и любвеобильный Строителю настоящих и грядущих!**

**Свят, свят, свят еси Господи Боже наш, от четырех стихий составивый тварь и четырьми времениы круг лета венчавый!**

**Свят еси Господи Боже наш, повелевый солнцу светити во дни, и луне со звездами просвещати ночь!**

**Свят еси Господи Боже наш, изводяй ветры от сокровищ, одеваяй небо облаки, и посылаяй дождь и росу в прохлаждение зноя!**

**Свят еси Господи Боже наш, препоясуяй холмы радостию и доли веселием, украшаяй крины сельныя и венчаяй поля класами!**

**Свят еси Господи Боже наш, посылаяй пищу птенцем врановым, напаяяй вся звери сельныя, и полагаяй щедроты Своя на всех делех Своих!**

**Свят, Свят, Свят еси Господи Боже наш, помилуй ны, падшее создание Твое, имене ради святаго Твоего!**

#### Кондак 4

**Б**урю внутрь имея душепагубныя ереси, вторый Иуда, Арий безумный, отвержеся Тебе Сына Божия, Единого от Пребожественныя Троицы быти; мы же аще и ино лице Отчее, ино Сыновнее, ино Святаго Духа глаголем: но Отчее, Сыновнее и Святаго Духа едино Божество, равну силу, соприносущно величество, сердцем и устны исповедуем, и яко Трисолнечным светом в купели крещения озареннии, Отцу, и Сыну, и Святому Духу, Единому Богу покланяемся, зовуще: Аллилуиа!

#### Икос 4

**С**лышавше пастырие и учителя Святыя Церкви Ариа, яко лютаго зверя, вторгшася в словесное Христово стадо, и восхищающа овцы от истиннаго исповедания православныя веры, сошедшеся в Никеи на Соборе, Бога, а не тварь, Христа исповедаша, и равна Отцу Сына и Святаго Духа чтуще, громогласне возгласиша:

**С**вят, Свят, Свят еси Господи Боже наш, Боже Отче, Боже Сыне, Боже Душе Святыи, Единый Истинный Боже, а не три бози!

**С**вят еси Господи Боже наш, несозданный Отче, несозданный Сыне, несозданный Душе Святыи, Единые вкупе несозданне, а не три особы несозданны.

**С**вят еси Господи Боже наш, Отец раждаый предвечно Сына, Сын раждаемый безлетно от Отца, Дух Святыи из Него же от век происходяи, но не раждаеся!

**С**вят еси Господи Боже наш, Отец, воззваый нас от небытия, Сын, искупивый нас падших Крестом Своим, Дух Святыи, освящайи и животворяи всех Своею благодатию.

**С**вят еси Господи Боже наш, в духе, душе и теле нашем трехчастную скинию на вселение Свое основати благоволивый, и всеконечне грехом разрушитися ей в нас не попустивый.

**С**вят еси Господи Боже наш, знамение Триипостаснаго Существа Своего на всех делах рук Своих, в мире видимом и невидимом, положивый!

**С**вят, Свят, Свят еси Господи Боже наш, помилуй ны, падшее создание Твое, имене ради святаго Твоего!

## Кондак 5

**Пребезначальная и Вседетельная Троице, создав нас по образу и по подобию Твоему, заповедала еси творити угодная пред Тобою: мы же, окаянии, злую волю нашу возлюбивше, обеты Крещения отвергохом, образ Твой помрачихом; ныне же паки к Тебе прибегаем и молимся: “Подаждь нам благодать Твою, исхити нас из рук враг видимых и невидимых и спаси ны, имиже веси судьбами, да во веки веков зовем Тебе: Аллилуиа”.**

## Икос 5

**Видя разум превосходящая совершенства Твоя и неизреченная благодеяния к бедным сынам Адамим в Тя бо, Триединого Бога истинно веруяй, мертвый духом оживляется, оскверненный совестью очищается, погибший спасается, благодарным умом, благодарным сердцем, благодарными усты, от Тебе созданными, преклоньше колена, глаголем:**

**Свят, Свят, Свят еси Господи Боже наш, в Триипостаснем Совете Твоем положивый сотворити человека и в тело его, от персти взятое, дыхание жизнью из уст Твоих вдохнувый!**

**Свят еси Господи Боже наш, образом и подобием Твоим в лице Адама всех нас почтый, и рая сладости наследники учинивый!**

**Свят еси Господи Боже наш, разумом превыше всего видимаго вознесый нас, и тварь всю дольную под нозе наши покоривый!**

**Свят еси Господи Боже наш, древо жизни в пищу нам даровавый и даром бессмертия ны обогативый!**

**Свят еси Господи Боже наш, преслушавших заповедь прародителей наших и по грехопадении не оставивый, но на уповании спасения прямо Едема вселивый!**

**Свят еси Господи Боже наш, изведый и нас из чрева матере нашея и благодатию Евангелия, по рождении, освятивый!**

**Свят, Свят, Свят еси Господи Боже наш, помилуй ны, падшее создание Твое, имене ради Святаго Твоего!**

## Кондак 6

**Проповедник правды и ревнитель Святаго Имени Твоего, Илия досточудный, возван от Ангела, ста в горе Хорив: бысть же дух крепок, низлагаяй горы, бысть трус велий и огонь палящ, но не в сих Тя виде, и по огни глас хлада тонка, и тамо Господь; покрыв убо лице милотию, с веселием и страхом взываше: Аллилуиа!**

## Икос 6

**Возсиял еси в просвещение всему миру сияние трисветлаго Божества Твоего, отгнал еси вся идольская заблуждения, Триипостасный Боже и Господи; весь же род человеческий от долгия тьмы язычества в чудный свет Евангелия привел еси, имже озареннии, славим вседержавный Промысл Твой о нас, зовуще:**

**Свят, Свят, Свят еси Господи Боже наш, до конца растленную грехом тварь водами потопными потребивый и в лице Ноя обновивый весь род человекь!**

**Свят еси Господи Боже наш, отлучивый отца верующих Авраама от смешения язык и в потомстве его истинную Церковь основавый!**

**Свят еси Господи Боже наш, изведый люди Своя из Египта, препитавый их манною в пустыне и введый в землю, кипящую медом и млеко!**

**Свят еси Господи Боже наш, воздвигий Давида, исполнивый Духом Своим пророки и теми среди Израиля веру в Обетованнаго Искупителя сохранивый!**

**Свят еси Господи Боже наш, пленом вавилонским согрешшия люди Своя наказавый и, по скончании его, паки Иерусалиму возградитися повелевый!**

**Свят еси Господи Боже наш, Маккавеи в вере и преданиих отеческих непоколебимыми до смерти показавый, и Церковь подзаконную, яко невесту, до пришествия возлюбленнаго Жениха, целу соблюдый!**

**Свят, Свят, Свят еси Господи Боже наш, помилуй ны, падшее создание Твое, имене ради Святаго Твоего!**

## Кондак 7

**Хотя** проявити величие любви и милосердия Твоего к падшему роду человеческому, егда прииде кончина лета, послал еси Единородного Сына Твоего, рождаема от Жены, бываема под законом, да подзаконныя искупит, Иже, пожив на земли яко человек и искупив ны Крестом Своим, вознесся на небо, отнюдуже, исполняяй обетование, низпосла нам Пресвятаго Духа Своего, да зовем вси: Аллилуиа!

## Икос 7

**Дивное** воистинну и новое показал еси чудо, дивный в высоких, Господи, егда по низпослании Пресвятаго Духа на избранныя ученики и апостолы, извел еси их на проповедь всему миру, да возвестят великое имя Пресвятыя Троицы и пленят вся языки в послушание веры: тем же, чудящися силе и действию богодухновенных словес их, с радостию зовем:

**Свят, Свят, Свят** еси Господи Боже наш, избравый немощная, худородная и буия мира, да посрамят крепкия, славныя и премудрыя!

**Свят** еси Господи Боже наш, воодушевивый безчисленныя сонмы мучеников, да тьмами мучений и смертей запечатлеют истину Евангелия и силу благодати Христовой!

**Свят** еси Господи Боже наш, сердце равноапостольнаго Константина знаменем Креста преклонивый, и тем конец лютым гонением на христиан положивый!

**Свят** еси Господи Боже наш, седмию Вселенскими Соборы богоносных отец, яко седмию столпы, Церковь оградивый и еретическим треволнением неприступну сотворивый!

**Свят** еси Господи Боже наш, богомудрым учителем и великим подвижником благочестия, яко пресветлым звездам на тверди Церкви, возсияти даровавый!

**Свят** еси Господи Боже наш, и владыку земли Российския Владимира к свету истинныя веры наставивый, и тем всю страну нашу от прелести многобожия свободивый!

**Свят, Свят, Свят** еси Господи Боже наш, помилуй ны, падшее создание Твое, имене ради Святаго Твоего!

## Кондак 8

**Странно и чудно у дуба Мамврийска узрев Тя Авраам во образе Триех Мужей, аки к единому беседоваше, глаголя: “Господи, аще обретох благодать пред Тобою, не мини раба Твоего». Трием убо, в Триех явльшихся ему Лицах, Отцу, и Сыну, и Святому Духу, Единому же в существе Богу, до земли поклонися, зовый: Аллилуиа!**

## Икос 8

**Весь еси везде и всегда, не точию могуществом неизчетных силы Твоя, но и богатством вседетельнаго промысления Твоего о всяцем создании Твоем: нам же, якоже рече Сын Твой, и власи главнии вси изочтени суть у Тебе, да ни един из них падет без воли Твоя: темже, уповающе на Промысл Твой, со дерзновением и любовию зовем:**

**Свят, Свят, Свят еси Господи Боже наш, благоволивый всему роду человеческому разделитися на племена и языки, и коемуждо их место и время жительства указавый!**

**Свят еси Господи Боже наш, Имже сильнии пишут правду, соблюдаяй избранных Своих, яко зеницу ока!**

**Свят еси Господи Боже наш, от Негоже исходит всяка премудрость и разум, всяка крепость и сила, всяко здравие и лепота!**

**Свят еси Господи Боже наш, наводяй и отъемляй брани, венчаяй победою правое оружие, неправое же, посреде самых побед, предопределяяй к сокрушению!**

**Свят еси Господи Боже наш, даяй знамения на Небеси и на земли, посылаяй огонь, язву и глад на люди, да не до конца заблудят от путей Твоих!**

**Свят еси Господи Боже наш, возносяй смиренныя от земли, еже посадити со князи людей Своих, и низлагааяй гордыя, яко не обрестися месту их!**

**Свят, Свят, Свят еси Господи Боже наш, помилуй ны, падшее создание Твое, имене ради Святаго Твоего!**



## Кондак 9

**В**сякое естество, горе и низу, непрестанно славит Тя, предвечнаго Творца и Бога: на небеси едины, Свят, Свят, Свят, день и ночь взывают, друзии же венцы своя к подножию ног Твоих полагают: на земли же со всею тварию мы, яко украшеннии образом присносущныя Твоея славы, к Тебе молимся и от Тебе великия и богатыя милости чаем, зовуще: Аллилуиа!

## Икос 9

**В**етии многовещанныя, аще и много труждаются мыслию ко испытанию, о Таинстве Пресвятыя Троицы, но не могут разумети, како естеством Един есть Бог, в Триех же совершенных Лицех: мы же веруем точию сему и исповедуем, какоже, не испытуем, и неизчетная благодеяния к нам коегождо из Триех Божественных Лиц добре ведуще, с верою и благодарением зовем:

**С**вят, Свят, Свят еси Господи Боже наш, праведным судом Твоим всем нам в землю, от неяже взяты есмы, возвратитися, и паки в день воскресения из нея востати положивый!

**С**вят еси Господи Боже наш, солнцу, луне и звездам некогда померкнути, земле и всему, еже на ней, огнем преобразитися предопределивый, да вместо их явится Небо ново и земля нова, в нихже правда живет!

**С**вят еси Господи Боже наш, уставивый день, вонже предстанут на суд вся племена и языцы, да восприимет кийждо по делом своим!

**С**вят еси Господи Боже наш, имеяй в день воздаяния реши праведным: “Приидите, благословеннии Отца Моего, и наследуйте Царствие, уготованное вам от сложения мира».

**С**вят еси Господи Боже наш, от Негоже нераскаяннии грешницы услышат тогда со страхом: “Отъидите от Мене проклятии во огнь вечный, уготованный диаволу и ангелам его”.

**С**вят еси Господи Боже наш, обещавайый Церковь Свою до конца мира непоколебиму соблюсти, во еже неодоленной быти ей и от врат адовых!

**С**вят, Свят, Свят еси Господи Боже наш, помилуй ны, падшее создание Твое, имене ради Святаго Твоего!

### Кондак 10

**С**пасти хотя мир, явилася еси на Иорданстей реце, Пресвятая и Пребожественная Троице: Отец во гласе с Неба, свидетельствуяй о возлюбленном Сыне, Сын во образе человечестем, приемляй Крещение от раба, Дух Святыи, сходяй на Крещаемого в виде голубине: темже во Имя Единого Бога, в Три же Лица – Отца, Сына и Святаго Духа, научихомся просвещати Крещением всякаго грядущаго в мир человека, зовуще: Аллилуиа!

### Икос 10

**Ц**арю Превечный, сияй солнце Свое на благия и злыя, праведныя любяй, грешныя же милуяй, скверну душевную и телесную нашу омой, обитель Свою в нас, аще и недостойных рабех Твоих, сотвори благоволити, потреби нечистая наша помышления, изгладити неподобная деяния, направи язык глаголати благоугодная пред Тобою, да чистым сердцем и устны со умилением зовем:

**С**вят, Свят, Свят еси Господи Боже наш, о Немже апостольский лик яве глаголет, к Нему же пророческий собор выну взирает!

**С**вят еси Господи Боже наш, Его же полк мученический боголепно исповедует, и преподобных воинство Пресвятое имя славословит!

**С**вят еси Господи Боже наш, о Нем же пустынников множество присно въздыхает, от Негоже постников подвиги венчаются!

**С**вят еси Господи Боже наш, Емуже святители и пастыри благодарственное приносят пение, Имже вселенстии учителя во спасение наше богомудрствуют!

**С**вят еси Господи Боже наш, прими мольбу о нас и предстательство всех святых, паче же простирающую к Тебе о нас руце Свои Деву Пречистую!

**С**вят еси Господи Боже наш, огради нас святыми Твоими Ангелы, и отжени от нас духов злобы поднебесных!

**С**вят, Свят, Свят еси Господи Боже наш, помилуй ны, падшее создание Твое, имене ради Святаго Твоего!

## Кондак 11

**П**ение всякое изнемогает, тщася принести должное благодарение Тебе о всех и за вся, в Троице славимому Богу: не обретается бо ни разума, могуща сраспростреться мыслию ко множеству щедрот Твоих на нас, ни слова, во еже достойне изрещи я: обаче за вся, нами видимая и нам подаемая, буди Тебе, Пресвятая Троице, благодарение от нас, честь и слава, яковы же Ты Сама Твоего величества достойны и Тебе угодны веси: мы же, покланяющиеся Тебе, со смирением и любовью зовем: Аллилуиа!

## Икос 11

**Я**ко светоподательна Тя во обетованиих Твоих светильника, сущим нам во тме неведения о будущем жребии нашем явльшася, благодарне исповедующе и поне единого из блаженств, Единородным Сыном Твоим возвещенных, улучшить желающе, всеумильно с верою вопием:

**С**вят, Свят, Свят еси Господи Боже наш, уготовавый избранным Своим блага, ихже око не виде, ухо не слыша, и яже на сердце человеку не взыдоша!

**С**вят еси Господи Боже наш, Его же вси чистии сердцем узрят, якоже есть, и познают, якоже от Него сами познани суть!

**С**вят еси Господи Боже наш, в Немже вси алчущии и жаждущии правды обретут, николиже оскудевающее насыщение!

**С**вят еси Господи Боже наш, от Него же миротворцы, яко подражатели вся умиротворившаго Единороднаго Сына Твоего, возлюбленными сынами нарекутся!

**С**вят еси Господи Боже наш, у Него же кротцые наследят землю, и нищии духом улучат некончаемое Царствие!

**С**вят еси Господи Боже наш, обещавай вечное помилование милующим, и безконечное радование плачущим!

**С**вят, Свят, Свят еси Господи Боже наш, помилуй ны, падшее создание Твое, имене ради святаго Твоего!

## Кондак 12

**Б**лагодать Твою всеильную подаждь нам, Пресвятая Троице: прими исповедание грехов наших пред величеством славы Твоея, призри на воздыхания наша, низпосли нам духа умиления и щедрот, да, очищеннии душою и сердцем, сподобимся неосужденно звати к Тебе на земли, якоже взывают Ангели на Небеси: Аллилуиа!

## Икос 12

**П**оюще Твое всечеловеколюбное смотрение, славим Тя вси, Пребезначальная Троице, веруем во Единого Бога Отца, Бога Сына и Бога Духа Святаго, иного, разве Тебе, Господа не вемы, к Тебе припадаем и Тебе молимся, вопиюще:

**С**вят, Свят, Свят еси Господи Боже наш, буди нам во спасение, да не убоимся никоегоже зла, и в защищение живота нашего, да не утрашимся никоегоже врага!

**С**вят еси Господи Боже наш, грешныя кающихся спасаяй, спаси убо и нас многогрешных!

**С**вят еси Господи Боже наш, умножаяй всем милость Твою, умножи ю и на нас, и помилуй ны, яко немощни есмы!

**С**вят еси Господи Боже наш, продолжи нам век к покаянию и не осуди нас на посечение с смоковницею бесплодною!

**С**вят еси Господи Боже наш, избави ны искушений, от мира, плоти и диавола находящихся, и укрепи в вере и любви к Тебе!

**С**вят еси Господи Боже наш, сподоби ны лицом к лицу узрети Тя, и внити в светлый чертог Твой на брак Агнчий!

**С**вят, Свят, Свят еси Господи Боже наш, помилуй ны, падшее создание Твое, имене ради Святаго Твоего!

## Кондак 13

**О** Пресвятая, Животворящая, Неразделимая и Вседетельная Троице, Отче, Сыне и Душе Святыи, Едине истинный Боже и Творче наш! Нынешнее наше приемши благодарение, низпосли нам благодать и силу от высоты Святаго Престола Твоего, да, поправше вся плотския похоти, во всяком благочестии и чистоте проживем до конца дней наших, выну восхваляюще Пресвятое имя Твое и зовуще: Аллилуиа! **Трижды.**

## Икос 1

Архангели и Ангели, Начала и Власти, Престоли и Господствия, предстояще самому Престолу Славы Твоея, не довлеют изрещи величия совершенств Твоих: многоочити же Херувими и шестокрилатии Серафими, закрывающе лица своя, точною с трепетом и любовью взывают друг ко другу: Свят, Свят, Свят Господь Саваоф! Нам убо, иже прах и пепел есмы, кольми паче удобее любити молчание; но, да не толиких щедрот, в создании и искуплении на нас излианных, непамятливи явимся и неблагодарни, подражающе горнему славословию, с верою и любовью взываем:

**Свят, Свят, Свят еси Господи Боже наш, неисповедимая совершенств Высоте и неизследимая таин Пучино!**

**Свят еси Господи Боже наш, везде сый и вся исполняй, Единый и Тойжде вчера, днесь и во веки!**

**Свят еси Господи Боже наш, вся могий, нарицай не сущая яко сущая, низводяй даже до ада и паки возводяй!**

**Свят еси Господи Боже наш, испытуй сердца и утробы человеческия, исчитай звезды и всем им имена нарицай!**

**Свят еси Господи Боже наш, Егоже вси путие истинны и все судьбы оправданы вкупе и вожделенны!**

**Свят еси Господи Боже наш, отдавая грехи отцев на чада, милуй же и награждай в роды родов!**

**Свят, Свят, Свят еси Господи Боже наш, помилуй ны, падшее создание Твое, имене ради Святаго Твоего!**

## Кондак 1

**Предвечный Царю веков и Гóсподи,/ всяя твари видимыя и невидимыя Содéтелю,/ Емуже, в Троице Святей славимому Бóгу,/ всяко колено покланяется Небесных, земных и преиспóдных:/ тёмже и мы, яко крещенни в Трисвятое íмя Твое,/ аще и недостойнии, хвалебное сие дерзаем принести Тебе пéние:/ Ты же, яко Творец, Промыслитель и Судия наш,/ вонми гласу раб Твоих, и не остави милости Твоея от нас,/ да из глубины души выну зовём Ти:// Свят, Свят, Свят еси Господи Боже наш, помилуй ны, падшее создание Твое, имене ради Святаго Твоего!**